

TRAHISON

DESCOUVVERTE DE

HENRY DE VALOIS, SVR LA

vendition de la ville de Bolo-

gne à Iezabel Roync

d'Angleterre.

*Avec le nombre des vaisseaux pleins d'or &
d'argent prins par ceux de la ville de Bo-
logne, enuoyez par Iezabel audit
de Valois.*



A PARIS,

Chez Michel Iouin, rue Saint Jacques
à la Souche.

M. D. LXXXIX.

THE NEWBERRY
LIBRARY

C52

F

39

-326

1589/70



A V L E C T E V R.

L E C T E V R ly ce discours demonstrent
les menées
De Henry de Valois fauteur de tous mes-
chans
Perfide, desloyal, hay des bonnes gens
Et trouueras que Dieu n'ayme ses destinees



TRAHISON DESCOV-

VERTE DE HENRY DE VA-

lois, sur la vendition de la ville de

Boulogne, a Iesabel Roynne

d'Angleterre.



Hacun doit e-
stre seur, que le
vint septiesme iour
de Ianuier, dernier
passé, arriva en la
ville de Bolongne,
vn Anglois en-
uoyé de la part de

la Roynne d'Angleterre, avec deux vais-
seaux, plains d'or & d'argent qu'il ame-
noit, & auoit semblablement vn pac-
quet de lettres. Or estât entré en la ville
il demanda à parler à monsieur le Cap-
itaine de Bernay, le Gouverneur, mais
il ne peut parler a luy, ne mesme faire
ses affaires selon son desir (côme il pre-
tondoit) car les habitans auoient esté

aduertis quelque temps deuant par le Seigneur Detray, Lieutenant du Capitaine de Bernay susdict, qu'il debuoit arriuer gens d'Angleterre, pour se rendre maistres de leur ville, pour ce que Henry de Valois, pendant qu'il estoit Roy de France, l'auoit vëdue a la Royne d'Angleterre, & auoit suborné de Bernay le Gouverneur dessusnommé, pour luy liurer: ce que de Bernay luy auoit promis, ayant esté tant par les dōs de Henry de Valois, que de la Royne d'Angleterre, suborné, & gaigné, pour a quoy obuier ils auoient tué & mis a mort leur Gouverneur, affin de n'estre trahis par luy, pour Henry de Valois, à cause de la Royne d'Angleterre, de la quelle ils voyoient de iour à autre, ce gouverneur recepuoir present, dōc cest Anglois faché de n'auoir point trouué le Gouverneur, & de ce trop importun pour son profit (que ie parle ainsi) cōbien qu'il ne s'apperceut que on sceut ce qu'il venoit faire en ceste ville, se hazarda de parler au Seigneur Detray Lieutenant du Cappitaine de Bernay, &

gouverneur (comme pensoit cest Anglois) en son absence si bien que il parla à luy, & pensoit que ce Lieutenant eust esté aussi suborné par Henry de Valois iadis Roy de France, & la Roynne d'Angleterre, ce que toutesfois n'estoit pas & sur ceste pensee s'assurant, il declare a ce Lieutenant pourquoy il estoit venu, & luy conte les intelligences de Héry de Valois avec la Roynne d'Angleterre, en forme de deuis, & luy dict aussi qu'il arriuoit deux vaisseaux pleins d'or & d'argent, & puis apres luy bailla le pacquet de lettres lequel ayant ouuert & leu, il trouua en escript ce que cest Anglois luy auoit dict de bouche, & apprint que la Roynne d'Angleterre enuoyoit deux millions vn d'or & l'autre d'argent à Henry de Valois, pour faire la guerre cōtre les Catholiques. Or ce Lieutenant ayant oy, leu, & veu tout cela, il fait semblant a cest Anglois d'estre bien aise de ces nouuelles, & dict à cest Anglois qu'il allast faire haster ces vaisseaux d'approcher & venir a bort, de quoy cest Anglois bien aise, s'en va les fai-

rehafter, & auffi tost qu'il fust sorti hors de la ville, le Lieutenant va communiquer ces lettres aux principaux de la ville pour demonstrier que ce dōt il les auoit aduertis deuant estoit vray, lesquels ayant veu ces lettres, demanderent au Lieutenāt s'il auoit faict respōce à ces lettres, lequel leur dict que nō, mais scullement auoit dict à cest Anglois qu'il feist hafter ces vaisseaux, ce que les habitans trouuerent fort mauuais au commencement, mais quand il leur eust dict pourquoy il l'auoit faict, ils trouuerent bonne ceste respōce, & delibererent vnanimemēt, oyant la raison pour laquelle ce Lieutenant l'auoit faict (qui estoit de se mettre trouppes de gēs au bort de la mer, & tirer sur ces vaisseaux affin de les faire submerger dedās la mer) d'y aller, ce qu'ils feirent & tirent sur ces vaisseaux & les feirent submerger, & ne feirent cela pour autre raison, sinon pource qu'ils craignoient tous que au lieu d'argent dedans les vaisseaux n'y eust eu des gēs cachez, lesquels entrez dedans la ville,

s'ils eussent peu comme ils pretendoiēt par apres par le moyē du gouuerneur, si on ne l'eust tué, & qu'on n'eust faict accroire a cest Anglois qu'il n'y estoit pas, & qu'il s'estoit allé promener à deux lieues de là, & fussent sortis apres, & se fussent rendus maistres de la ville: car se sont ruzes & stratagemes de guerre qui se praticquent tous les iours en guerre, qui seruirent beaucoup aux Grecs à prendre la grand Cité de Troye, estans entrez en icelle dedās vn grand cheual de Bois, dans le vêtre duquel y auoit grande abondance de soldats armez, & par ce moyen là la prirent. Mais le bon Dieu qui cognoist toutes choses ne permit pas qu'il aduint aucun mal à ceste ville Catholique, ains a f iēt que de iour en autre on cognoistra comme Henry de Valois est plus heretique qu'autre, & qu'il adhere, & à tousiours adheré plustost a la Royne d'Angleterre, trescruelle huguenote, qu'a nul autre Roy ne prince Catholique, laquelle luy a appris a massacrer les Princees Catholiques cōme Messieurs les Cardinal & Duc de Guise,

lesquels il na fait massacrer en la ville de
 Blois pour autre cause, sinon pour ce q
 ces bōs princes soustenoiet l'Eglise & le
 peuple, & s'en rédoient les protecteurs,
 cōme au cōtraire, luy se rend fauteur &
 appuy des Ateistes, hereticques, poli-
 ticques, inuenteurs, exacteurs, ronge-
 peuples, & de toute autre maniere &
 sorte de ces gens qu'il a tousiours eu, &
 a encores aupres de luy, qui ne vallent
 pas le pendre, lesquels il a tousiours
 conseruez & ayez, en obseruant en
 toutes manieres les deportemēs, faicts,
 & gestes de Mahomet lequel escript qu'il
 faut tyranniser le peuple cōme il a faict,
 qu'il faut tantost fauoriser l'vn, tantost
 l'autre nager entre deux eaux, estre tous
 iours des plus forts, estre traistre, perfide,
 desloyal, poltrō, heretique, Ateiste,
 faire daces, tailles, imposts sur tout, &
 iusques sur les choses les plus villaines
 & absens iusques a l'exemple de celuy
 qui en faisoit sur le pissat, en disant &
 recitant le poëte Satyrique, L'odeur &
 senteur de l'argent est bonne de quelle
 chose qu'elle puisse prouenir, ce qu'il a
 fait

fait tant qu'il a regné, & mis à executiō tant & si longnemēt, que Dieu s'en des-
 plaisant, a incité le peuple à se bander
 contre luy reellement & actuellement
 s'vnir ensemble, colliger argent pour
 souldoyer hommes d'armes pour luy
 faire guerre, & le deposseder de sa cou-
 ronne, comme en estāt indigne, à quoy
 il faut tendre, & prier Dieu tout bon &
 tout puissant de nous en donner & o-
 ctroyer vn autre, qui soit protecteur de
 l'Eglise, & deffenseur du Peuple, com-
 me est Monseigneur le Duc du Maine,
 Prince tres-generoux, & qui a mieux
 meritē la couronne de France que nul
 de tous les Valesiens, ie passe tous les
 Bourbons aussi, exceptant Reuerend
 pere en Dieu Monseigneur le Cardinal
 de Bourbon, lequel, comme ie croy,
 octroyera de bonne volonté à Monsei-
 gneur le Duc du Maine le iuste herita-
 ge & succession qu'il a à la Couronne de
 Frāce pour empescher que tous les au-
 tres, ses parents, tous heretiques n'y ap-
 prochent, & pour en bānir du tout cet
 heretique, excommunié, & bastard de

Roy de Nauarre, & le priuer & repouffer, de peur qu'il n'y entre: car s'il y estoit vne fois entré, il mettroit toutes les villes Catholiques & les habitans d'icelles à feu & à sang, & Dieu, comme ie croy, le fera, quoy que dient & facent courir par le monde quelque politiques cachez, & quelques Catholiques à gros grain, lesquels on deburoit tous brusler dans vn mesme feu, & mettre en cédre les herezies, non pas seulement en papier, car ce n'est pas assez, & pour vray dire rien, mais aétuellement & de faict, pour lesquelles reduire en cendre, & conuertir a neant, on veoit Messieurs de la ville de Paris prendre peine tresgrande, affin d'y paruenir, & y paruiendront, comme ie croy, estans venus à bonne fin par cy deuant de leurs affaires, & ayant tant faict, que presque desia les notables villes & Parlements de tout le royaume de France, se sont vnis avec eux, comme Thoulouze, Rouen, Dijon, Amiens, & plusieurs autres villes, & toutes (que ie dis ainsi) sin on celles qui n'ont point esté aduerties des

meschancetez de ce malheureux Henry de Valois, aussi ont ils eu recours à Dieu, qui gouuerne tout, l'ont inuocqué, & ont dict ce que nous debuons dire tous avec le Psalmiste royal Dauid, mon Dieu sauue nous, guide nous, gouuerne nous en ton nō & en ta voye, deliure nous de ceux qui nous persecutent, & decharge nous de tous nos maux: & apres qu'ils ont faict ces prieres eux mesmes, ils ont faict faire par toutes sortes de gens, mesmes par des petits enfans, tous nuds pieds, ce qu'on faict tous les iours comme vn chacun peut veoir, & sans cela nous n'aurions pas toutes choses si a souhait comme nous auons, & pouuons dire, que Dieu nous a bien aydez en ceste affaire cy de ceste ville de Bologne, vendue sans doubte a la Royne d'Angleterre, par Héry de Valois, par le moyē de ce mechant & damné Ambassadeur d'Angleterre, Edouart Staffart, lesquels si par la grace de Dieu n'eussent esté decouverts infailliblement les Anglois se fussent ioincts par le moyē de ceste vil-

Ielà avec Henry de Valois iadis Roy
 de France, & nous eussent faict grand
 peur, mais cōme ie viens de dire, Dieu
 mercy nous sommes hors de ce mal,
 qui (si Dieu n'y eust pourueu) estoit
 pour tomber sur nostre teste. Parquoy
 il faut rēdre grandes graces à Dieu, le-
 quel faict que nous remportons touf-
 iours victoire sur nos ennemis, & que
 nous descouurons de iour à autre les
 intelligences & conniuenes que Hē-
 ry de Valois iadis Roy de France pra-
 tiquoit, tandis qu'il l'estoit avec la Roy-
 ne d'Angleterre, cruelle huguenotte,
 & plus cruelle qu'aucune de qui on aye
 ouy parler, car elle persecute si seuerē-
 ment & inpitoyablement les bons Ca-
 tholiques, sans auoir esgard à la quali-
 té, que seroit chose pitoyable d'en par-
 ler: car elle cloue les vns aux roues des
 charretes, les autres les brusle, leur tire
 le cœur hors du ventre, leur met de la
 poudre à canon dedans les oreilles,
 narinnes, bouche, yeux, & autres per-
 tuis du corps des hommes & femmes
 & puis après alume du feu dedans. Bref
 les faict mourir plus cruellement qu'el-

I.

le peut penser, ce qu'elle à apprins a Hē-
ry de Valois, qui a tasché, cōme hereti-
que qu'il est, à nous en faire autāt, mais
il n'a peu, car Dieu qui est pour nous
ne la pas permis, lequel selōce que nous
le prions exauce nos prieres. Et en sou-
uenance de ces biens faiēts qui iournel-
lement se monstrent à nous & nous ad-
uiennent, il l'en faut remercier, comme
i'espere que vous ferez de vostre costé,
& moy du mien, & le prierez que selon
sa clemence coustumiere, il aye pitié de
vous tous Chaholiques qui le deffen-
dent, & le faiētes ie vous prie par pro-
cessiōs, deuotes oraisons, prieres, ieuf-
nes, comme vn chacun de nous doibt
faire le sainēt temps de Carefme appro-
chant ce que auez commencé de faire,
mais ie vous prie de continuer & prier
Dieu qu'il vous conduise & guide en sa
voye, & vous face ce bien que veniez à
bonne fin de vos affaires qui vous re-
stent, & remportiez la victoire contre
Henry de Valois, iadis Roy de France,
& tous ses adherēs nos ennemis, Dieu
nous en face la grace, ainsi soit il.

F I N.



